

湘

軍

志

水師篇第六

湘軍志六

咸豐二年冬湖北巡撫常大瀆奏言寇水陸攻武昌船礮充斥聞湖南大軍有廣西礮船江南水師有廣艇礮船及中小號礮船請調集江上下游乃可制遏賊勢斷其糧運 詔徐廣縉等飭行時武備弛徒存水師名無船也徐廣縉奏有盧應翔以礮船戰於長沙長沙人未之間及 詔問乃知云陸建瀛防江有大小三板八槳船向榮奏遣張國樑率湖南礮船所謂湖南礮船者以民船載礮 詔徵登州水師船亦募商舟及寇破武昌東下連舟數千皆商舟也祥厚奏言江甯留船十以分

防蕪湖梁山已足矣其不知水戰如此三年春九江陷
向榮奏調外海戰船快蟹大巴百餘取海道至江南又
調上海道吳健彰領柁罟戰船溫州總兵領頭舂等船
備水戰而麟桂以練習船礮名及李德麟吳全美之徒
稍有聞矣五月寇既北渡淮河南圍南昌御史黃經上
書言兵勢始請吳楚蜀疆臣各造船練士乘流攻寇乃
指名及湖南其時道路阻塞朝報不時至 詔飭駱秉
章秉章以力所不及又凡言官論列例不行未甚省也
曾國藩聞湖北戰船敗於田鎮謀守湘乃試連木筏載
礮橫湘水十月 詔國藩督練勇援武昌漢陽始命率

船駛赴下游而國藩亦先於衡州治水軍訪船制皆不知其狀筏成不可用羽檄徵軍日數至人人以逗留為疑乃歎曰今寇往來陽邏湖南北所費殆二十萬彼縱橫江湖非舟楫無與爭利害且成師以出當為東征不歸之計九江以上千里如洗奈何以倉卒召募之眾執蠶脍之器徒步三千里以當虎狼百萬之彊寇乎水師守備成名標者頗能言船駛事國藩亦自以意用商船改造為長脣寬舷試發礮果不震而資費無所出乃奏截留大營粵餉銀八萬興水軍四千船二百其大自五百石及千餘石礮自二百斤至三千斤又推五日競渡

船意為短橈長槳如蛇足以人力勝風水奏徵右江道
張敬修率戰船不果來而同知褚汝航奉檄代敬修造
長龍戰船於湘潭先成名標於衡州造者曰快蟹三板
閩越船制略備矣然非有法直以意消息屢改乃成其
軍亦募操舟人為之增設礮手其統將國藩自主之其
裨將亦號營哨官純用儒生農氓或陸營并丁其經營
尺寸輕重之度數皆自慮度之而總督吳文鎔頗與同
心時相商定焉四年二月船成凡大小二百四十輜重
礮船百二十輜重民船百水軍五千分十營設糧臺舟
中器物食用工匠畢備合陸軍五千發衡州浮湘東下

軍容甚壯當是時吳文鎔以促戰先出敗死湖北水軍
盡散而寇入洞庭步上犯甯鄉及遇水軍下寇遽退湘
陰岳州皆復三月寇復上岳州防軍潰賴礮船以免丙
午大風壞船漂損大半戊申以陸軍敗還長沙整軍寇
遂上犯屯靖港及湘潭城腹我軍當是時寇若從湘潭
上游乘春水攻省城及從靖港乘北風來攻皆不過行
二十刻勢危急我軍聞吹角及火光皆自驚寇竟不來
四月己巳朔塔齊布援湘潭戰勝報未至軍中議曰陸
軍敗皆潰死矣宜及軍士心未散率水軍進攻水陸交
爭冀一當於是議所鄉用水師營官彭玉麟定計全軍

上攻湘潭四營夜發約明日國藩帥四營繼之比至湘潭十里止偵者還言塔齊布已大勝乃約水陸循城進攻盡收所掠商船百貨闐委彭玉麟計軍士貪虜獲必懈乃悉縱火燒船貨火延岸上光燭數十里寇先本杜舟中者倉卒不得走雖亦發駭相拒不能水戰傷溺者千計城寇失計棄城走燒寇船之日國藩帥四營下攻寇靖港敗還城中大震得湘潭水陸捷書乃大定五月寇陷常德水軍船方艤巡哨小船莫能救然寇益不敢入湘六月山東登州總兵陳輝龍自廣州來會師廣東游擊沙鎮邦從廣西道員李孟羣自桂林來亦將水軍

水軍益盛庚辰發長沙甲午渡湖前隊營官褚汝航夏鑾彭玉麟楊載福鄉導官何南青將二千人遇寇湖中遂屯萬石湖丙申分五隊蘇勝將先鋒船趨南津夏鑾繼之彭玉麟伏船君山楊載福伏船雷公湖何南青建旗吹角列陳於後寇掠商舟載礮陳南津持不進三版小船趨港中寇爭出三版陽卻誘之寇舟連檣上玉麟等鈔之商舟旋轉不利戰退則相撞礙燒沈百餘舟奪舟三十四礮十三其夜南津及城寇潛避七月己亥屯南津庚子寇復上巨艦乘北風以壓三版三版斜進擲火燒寇火藥煙蔽江寇斫其舟工舟工愈亂遂敗去追

奔七十五里奪寇大舟七十六自是寇不復上壬寅攻
之雷鼓臺寇依岸自保進攻多傷會暮軍懼楊載福曰
今退我船不滿百寇十倍我敗矣非冒死出奇不得免
躬乘三板衝寇屯直下彭玉麟中礮傷竟燒寇後舟寇
爭還救乃大亂載福自此以勇略名與玉麟皆為水軍
名將而陸軍有塔齊布羅澤南塔羅彭楊軍中無與為
比壬子陳輝龍將後隊至南津間彭楊等戰勝則以為
寇不足破癸丑自將攻城陵磯湘軍頗疑南風下水難
退輝龍曰吾習水戰三十年諸君無以為憂平旦發礮
遂行廣東軍旌旗鮮明刀矛如霜雪洋裝銅礮震山浦

諸軍皆自失以為不及褚汝航夏鑾請同行楊載福亦乘小船往觀戰沙鎮邦先進寇舟拒戰敗退輝龍乘拖罟大船至中流舟膠寇伏舟齊出鎮邦船已逼寇屯不得還諸小船來救輝龍水急風利返吹俱下寇依岸逼我軍欲登陸則逼寇發礮恐傷前船寇爭來奪船汝航鑾鎮邦赴水死輝龍陷寇軍覆船礮盡喪寇乘拖罟還城陵磯拖罟者閩廣水師大艦也國藩初造船無之輝龍至乃造二拖罟其一以獻國藩其一自乘之既敗水軍損失大半然自此益知水戰利害閏七月戊辰朔李孟羣再攻城陵磯小利而陸軍大捷己巳楊載福等知

寇將遯出要其舟寇皆乘小舟下走而鑿所得柁罟船
沈之江中辛未悉平寇兩岸礮臺按螺山倒口六谿口
入黃蓋湖還收嘉魚復蒲圻遂會湖北軍甲午進屯金
口八月己亥王明山下窺鹽關寇水陸圍之三版六拒
寇舟數十突圍出傷兩人耳甲辰楊載福巡沌口丙午
湖北陸軍攻漢陽關未戰軍潰李孟羣檣岸擊寇陸軍
得不敗己酉國藩來視師遂登小軍山望武昌漢陽寇
屯寇來襲敗去丁巳燒鹽關寇船二百沿江寇壘九戍
午楊載福等衝寇屯攻塘角遂至青山寇礮擊之三版
人皆露立櫂船徐進有俯首避鉛丸者眾目笑之以為

大恥水軍之初立也謀避礮百方皆弗良至是諸言避
礮者盡絀寇從城上望見相顧失色繼而逃者日殺百
數不能止明日武昌寇棄城走漢口漢陽寇皆乘夜具
舟遜武漢之復不勞力由劫水軍使寇震怖無策故千
里無留行焉下江屯寇聞之兇懼以水軍不可與爭鋒
則據江險悉衆屯田鎮九月丙子前軍攻蘄州寇馮城
不敢出陸軍後屯漳源十月丙申朔會陸軍於田鎮寇
壘連四十里夾江為五屯據半壁山鐵索纜江連舟承
其下上作大筏列礮橫中流守以礮艦其下游寇舟五
六千率掠逼商民船以供運載自江甯陷後通江諸城

鎮無甯日以此也己亥羅澤南等攻山大破之縋崖下
斫江瑣明日瑣復續國藩令曰水軍牽於蘄城蘄寇舟
城相倚角形勢不便宜分船衝下游得至半壁山合陸
軍而屯破賊必矣癸卯彭玉麟楊載福順流移屯蘄寇
戰艦不能追唯發礮與岸上礮迭擊哨官蕭世祥中礮
死軍士多傷竟下下十五里止乙巳蘄舟寇乘西風走
保田鎮丁未進屯見峰岨癸卯屯十六里田鎮九里玉
麟載福間行入塔齊布軍謀合攻還分船為四隊戒曰
各有司誤者斬待令而後動備鑪鞴椎斧炭翦於頭隊
船劉國斌孫昌凱領之昌凱故鐵工習冶鍛令專斷鐵

瑣戍申水陸軍大出玉麟戒昌凱曰毋發礮毋仰視直
趨鐵纜下彼筏上礮一發船乘流已下矣吾親為公拒
寇舟遂將二隊出戰楊載福將三隊待瑣開留四隊守
屯以防寇鈔寇恃礮以為船不能近纜及國斌等直下
玉麟繼進寇舟未及移環擊之燒二舟國斌椎鎖下鉗
鉗落筏空昌凱鼓鞀治瑣瑣斷纜開筏上寇潰走溺水
被斫死者無算楊載福候纜開衝下下游舟中寇愕不
知何軍乃從篷上望之或有覺走者舟連數十里走輒
絀而止載福直進至武穴乃回船擲火燒而上玉麟燒
而下於是東風起載福乘風玉麟乘流天明合軍俱還

寇舟燼岸上寇已夜走斬寇亦由陸遯走廣濟甲寅前
軍至九江田鎮已破湘軍水師名天下 文宗采其戰
法手詔宣示江南北諸水軍江南北水軍師艇船不諳
戰續徵紅單拖雷船皆待風乃行所至淹留而江西亦
造戰船頗用湖南船制以無將領輒敗退湖南杜籍官
丁善慶陳本欽唐際盛李緊等始捐貲設船局而黃冕
專製礮以應征軍言船礮者莫能及湖南焉然太鋒銳
深入要利卒以至敗寇距九江城於湖口梅家洲作堅
屯二與城相鼎峙北屯小池拒陸軍辛酉李孟羣等攻
城城北洲壘木設礮旁維大舟小艇環衛之孟羣先攻

其大舟戰不利蘇勝鄭沐中礮死李金梁船沈溺於江
寇既見官軍水戰法亦并力於水戰多造小艇依大舟
以出方冬風壯江水涌起戰船苦震簸寇又循岸射火
燒船軍日夜危苦思番休而陸軍以克城杜旦暮方曰
日言戰十一月戊寅塔齊布破孔龍寇屯己卯小池寇
遯北岸既得遂圍九江寇悉眾保湖口彭玉麟等扼江
與相持丁亥寇載火夜燒江外船卒孟羣列隊待之火
舟至鉤放溜中終不得近十二月辛丑彭玉麟等攻湖
口寇筏破之士死傷相積寇亦殊死鬥其筏上作木樓
馮樓發礮樓傾或飛投江中洄而走其堅悍若此丙午

蕭捷三等以寇屯湖口梅洲堅實慮其掠鄱湖內犯通
資糧率輕船闖姑塘諸勇銳爭從之既入乃不見一寇
會暮止屯寇瞰大船勢孤出小舟二十攻坐營都司史
久立戰死寇小舟循官軍大船間拋火焚快蟹九長龍
七諸軍三版大半入姑塘無鬥志乃夜還九江大營時
楊載福養病武穴聞敗還爭湖口不利寇復北渡踞小
池已未湖口陸軍亦退保九江其夜小池九江寇負小
舟數十直犯國藩柁罟大船國藩懂而免水軍遂大亂
入姑塘者方益進至南康間坐營潰退還望湖口寇已
作兩浮橋通岸往來捷三等乃遂取食吳城因襲都昌

寇舟破之然無統將且輜重阻絕漂泊章鄱間有船百
二十人三千為客兵而外江內湖水師分實始於此外
江自己未夜潰俄而寇從廣濟追楊霈至漢口五年正
月丙寅李孟羣以船五十還救武漢戊辰大風損船四
十餘船不能軍乃令彭玉麟等沂江名援武昌而修船
新隄國藩自是入陸軍未幾移屯南康就蕭捷三等取
船江西立內湖水營而江西糧道鄧仁埜主製造二月
寇陷武昌自是寇專力陸道故城陷不能救三月湖南
益發新船百餘至金口彭玉麟募軍實之合舊水軍為
三千人與湖北巡撫胡林翼陸軍相輔四月王國才進

攻漢陽將築屯寇前後鈔之玉麟望陸軍已被圍舍船
登岸反鈔寇多斬獲寇乃散走六月楊載福自岳州增
募船軍合先屯為十營內湖蕭捷三等增軍屯南康為
八營楊載福既至金口則議攻寇武昌以李孟羣所部
弱留孟羣將陸軍守金口而林翼及玉麟先入漢攻蔡
店玉麟以小船入沌掠赤野湖東而北絕漢至涇口順
流東還北破宗關石壘南攻漢陽寇舟岸發礮不得近
遂北攻漢口寇舟乃出沂流上欲鈔我夾擊之奪其舟
九出漢口攻寇浮橋燒寇舟三百凡三日寇不出楊載
福自外江來會師同出江屯沙口沙口者武昌下游三

十里至沌口六十里還沌口當從武昌漢陽城下過載
福之出也寇無備而玉麟從漢口渡江距兩城遠故寇
駁不甚相及既空屯沙口不能助攻戰乃議還眾議由
漢入沌雖迂遠其避駁宜易載福慙之曰丈夫行何所
避浮江下沂江上乃為快耳玉麟恥後之張帆先行寇
先已密備覘我還路檣舟傍中流及城上縣駁并發諸
軍但冒進不知誰生死駁丸飛鳴船倉羣子以斗計擊
沈四船中駁死者三百人駁擊玉麟桅柁不能進望見
載福自呼之載福船瞬息已去成發翔三坂過玉麟躍
入得免知其事者皆不直載福而玉麟曰風急水溜呼

固宜不聞載福先已不樂玉麟林翼親拜兩人和解之內湖水師既成而寇亦於九江造戰船悉仿官軍制四月自姑塘上犯敗官軍五月復戰敗之奪柁罟以歸柁罟者即陳輝龍所造九江所失者也六月進攻湖口不利七月合陸軍攻湖口寇馮岸發礮蕭捷三中礮死八月乘流攻湖口南風急船駛陷寇壘下喪船二十一奏奪五營營官秦國祿等官而急召玉麟於是陸軍大將羅澤南援武昌而玉麟還領內湖軍李孟羣改統陸軍而楊載福領外江軍載福議以孟羣舊部多不可用汰羸怯十之五十一月外江軍合陸軍逼圍武昌時玉麟

當之南康江路絕則道湖南趣陸行阻袁瑞寇四五百里行旅相戒惟通寇者乃得達玉麟敝衣徒步往從者數人行二三日皆懼不進欲上取贛則吉安亦陷非從廣東閩浙不可至南昌玉麟謝去從者偽為游學乞食經寇關丰數十寇無覺者至南昌城門訶禁之問其實報院司皆大驚怪軍中間其至氣自倍自十二月至六年二月外江軍數苦戰寇舟亦日益四月移屯沙口楊載福念寇舟來則依岸而其上下皆乘風船礮制法同官軍與我共長江恒避戰終不可勝宜深入襲燒之則募軍士尤勇者駕千石大船實消黃蘆菽施火綫約曰



待近賊而發發則登三版以自救且急歸應募者三百人其夜載福設酒具五俎之食饗三百人躬自行酒勉之曰成功歸者人犒百金有官者超兩階白丁拔六品實職無負我既出人相語曰觀此往必死也有悔者或潛去或又自奮曰壯士死一言耳權帆遂行逼寇舟南岸甯屯火發皆自躍登三版或遲傷火及墮水者死哨官一傷勇丁四十餘皆鼓櫂還載福親迎勞頒賞自是寇舟能戰者二百餘皆燼火藥衝寇空中墮江水及岸相積而前軍游擊乃直至黃州寇不復上旬日巡哨船掠巴河蕲州揚兵九江城下寇震駭援絕武昌漢陽坐

困矣十一月林翼復大治戰船增軍至七千人合二十四營立船局沌口以時修脩其月武昌漢陽同日復乃移船局漢口載福遂同復武昌縣及黃蘄燒武穴龍坪小池諸寇舟奪大小戰船五十八十二月水陸軍圍九江內湖軍往來吉袁臨瑞建昌南康饒廣間日有戰事以陸軍屢敗不得志然所杜扼寇寇亦不能長驅江西亦自立水軍以劉于瀆領之常屯樟樹為省城西防七年二月國藩遭父喪奏言臣軍事以水師為大楊載福所統十營彭玉麟所統八營合大小戰船五百艘二千請以署湖北提督楊載福為總統惠潮嘉道彭玉麟為

協理 詔從所請五月湖口寇舟上犯外江軍出擊之
乘風追過百里及還寇尾之別從扁擔夾出小舟要之
軍敗哨官易景照等死者二十一人勇丁死者百四十
八人喪船十八蓋水戰風水俱順則行急礮無準俱逆
則膠滯不得進數以此敗非善戰者莫能操其機則順
水取逆風逆水取順風將勇者勝焉閏五月寇從陸道
上窺蘄黃分船守蘭溪巴河樊口陽邏沙口而大營屯
官牌夾以攻小池八月小池拔九月始復攻湖口先是
王麟軍杜江西歲餘無所得餉借領火藥亦斬之時內
湖軍屢攻石鐘梅洲寇屯不下聞外江軍至剋期遣謀

告九江圍軍合攻丁亥平旦玉麟率全軍分三隊出湖
載福臨江口發礮應之寇併力拒湖內軍城洲兩岸礮
凡如雨玉麟令三版先出大船繼之寇度船所經直石
鐘山下有石崖高下與三版相當即輦巨礮崖口一發
中前船都司羅勝發礮玉麟令回船後者進有死者復
回船後者迭進傷死相繼莫敢退或諫曰今驅士卒與
飛火爭命非兵法也玉麟曰自水陸用兵于此五年精
銳忠勇之士斃命于此千數矣湖北江西以此被屠戮
者數十萬每一念之煎心且久困若不破此險無生理
今日固死日也義不令士卒獨死亦不令怯者獨生矣

鼓而進之寇屋下礮發火多銅焦礮者震死船銜尾直
下出江與外江合軍歡聲動江水於是沿江寇舟失勢
所杜擲火燒之舟盡燔而官軍船為鐵網牽絙篙檝不
利岸上寇復聚火槍擊水軍適會李續賓伏陸軍潛上
湖口城背山揚旗鳴角下岸寇驚愕大潰三軍合屯其
夜城寇破走洲上寇亦遁獲軍火子藥數十萬礮船八
十餘悉解江西辛卯乘勝奪據小孤山乙未載福攻彭
澤庚子克之前軍至望江望江寇遁壬寅復東流癸卯
過安慶舍城不攻攻樅陽壘破之甲辰破大通壘丙午
復銅陵下至峽口見官船旌旗偵者言此紅單船定海

總兵李德麟所將也丁未載福往見李德麟紅單船人皆聚觀以為此軍將從賊中來疑不可信李德麟因言方攻泥汊縣賞萬六千金攻七月堅不下明日載福令李成謀攻之櫂而進逼屯擲火屯中寇久懈殊不意有軍至皆長跪乞命獲礮百舟五米六屋及所俘寇盡以與紅單船回船而還是月初和春方奏言泥汊戰勝狀至是湘軍攻克而江南大營不復言泥汊蓋諱之云十月戊寅朔載福還師丙戌至湖口內湖軍先增二營為十營分八營屯章贛留二營湖口丙申江西寇自鄱陽窺湖口援九江為陸軍所敗還走池州前所復望江東

流銅陵三城復陷八年四月壬子水陸軍攻克九江外
江內湖軍要逃寇盡殲之 詔楊載福專征外江軍移
屯華陽鎮分防三營屯黃州彭玉麟駐湖口五月乙未
起國藩督陸師援浙載福復克東流進屯黃石磯六月
撫定建德寇復其城八月戊辰國藩載福奏祀陳叅將
士三千餘人於石鐘山內湖軍合陸師克吉安江西始
平九月辛巳合陸軍攻安慶十月辛亥三河軍潰寇大
上我軍分屯自九江至武昌十二黃石屯軍如故九年
寇別部犯湖南圍寶慶湖南北大震分遣蕭翰慶王明
山等四營入資水曾紹霖等二營防沅水左光培一營

防澧水五月師行七月還江防九月寇將韋志俊以池州反正玉麟船率內湖軍移駐黃石與楊載福合屯十月李成謀往撫池州寇衆叛攻韋志俊力戰擊走之收其衆萬人十一月徽甯寇來攻由陸登城池州陷拔餘衆還張谿十年三月浙江請援遣蕭翰慶改將陸師三千合領歸誠人三千援杭州道甯國副都御史張芾奏止韋志俊軍杭州已陷新任巡撫王有齡以寇退復奏止翰慶等仍隨張芾收旌德石埭太平廣德已而浙事亟飛檄召翰慶而韋志俊遂率所部依水軍四月外江營官陳金鼇合江南水軍攻梟磯寇屯破之五月蕭翰

慶遇寇湖州道戰死之餘眾入城助守江南大營潰蘇
州陷以國藩署兩江總督國藩自宿松移駐祁門議立
三路水師一淮揚一甯國一太湖林翼則議立衢杭水
軍而無甯國然皆不果行其後乃立淮陽太湖軍遂復
江蘇列縣云韋志俊從水軍復攻池州不克還攻樅陽
收之六月載福奏遣江南水軍將李德麟吳全美還守
鎮江分軍屯大通於時微甯繼陷陸軍自顧不暇安慶
雖合圍而寇窺蘄黃國藩受命節制皖南軍而總兵周
天受死甯國甯國餘民保南陵總兵陳大富血書求援
不能救乃令水軍赴其急謀拔出城中軍民棄城不守

載福念孤軍深入必俱危九月秋雨江漲躬率四營揚
言攻蕪湖時寇方於南陵作壘斷北港以困城中蕪湖
久無備偵水軍出度南陵不通舟即夜俱下赴蕪湖載
福宿魯港半夜令曰視吾船所鄉而進先者斬旦令兩
營屯港口已登三版令舵師曰往救南陵諸軍皆驚疑
以統將先則繼進港左右寇小屯三四處還出不意走
保城下大壘壘寇大半赴蕪湖我擲火則皆出走載福
叩城門呼大富曰今奉令拔城中居民可急裝入船令
戰船軍皆步循隄退出民老弱先壯者後戰船軍後載
福殿半日悉發逃寇走報蕪湖蕪湖眾還已暮矣寇呼

譟來追載福獨持矛立隄上眾不敢逼比出港而蕪湖
寇將舟至方與留防軍楊占鰲等相持見大隊船浮港
下亦退走軍民萬餘人分載諸船還黃石大營給棚帳
留二十五日十一月寇陷東流建德彭澤圍湖口分陷
鄱陽都昌載福玉麟躬出戰守玉麟入湖口登陣雨立
數日夜寇去遂分復五縣遷南陵軍民於東流浙江議
立水軍奏調營官劉培元培元先歸湖南領水軍杜衡
永防寇不果往自是東南七省皆自有水師戰船多用
湘軍將及製造皆仿湘軍焉十一年春寇復犯蘄黃遂
及德安頗窺彭澤大通聞瀕江地以防密輒退走玉麟

自率軍至武漢因巡江防會陸軍克孝感三月國藩
移駐東流安慶圍已三年曾國荃將萬人濬前後壕引
江水浮戰船互相倚寇帥陳玉成尤患之乃於菱湖北
作屯以通集賢關且作浮橋通城載福率師攻擾之陸
軍將曾貞幹築壘湖口以遏寇寇來爭戰且築寇亦更
築阻遏水軍船從兩壘間出土多傷四月王明山等入
石門湖合陸軍攻赤岡下游屯軍李朝斌等頻攻魯港
以牽寇援陳代友等入練潭與桐城陸軍相應五月蔡
國祥破菱湖寇屯李成謀攻無為青陽寇皆馮城不出
七月王麟會陸軍克孝感天門應城黃州德安載福假

歸八月丁巳朔安慶復寇先越湖遯走故水師先登辛酉趙三元克池州上游蘄黃次第平林翼薨詔玉麟為安徽巡撫九月丁巳王明山克銅陵無為黃翼升新立淮揚軍輔李鴻章陸軍援蘇常道絕未得進仍合諸軍防江十一月丁未攻運漕鎮癸丑攻東關皆破之以陸軍少留屯不進玉麟奏言臣起自諸生居戰艦十年與水勇柁工馳逐風浪封疆大吏進退百僚深懼弗克勝任詔敦促赴官再辭改水師提督明日又詔曰彭玉麟有節制之任武職不足資統率著候補兵部侍郎載福避御名改名岳斌以母病再請假詔促令

到防同治元年三月李成謀等合陸軍攻巢戰於銅城
開雍家鎮皆捷遂復巢城陸軍乘勝攻含山和克之蔡
東祥別攻濡須克之李成謀成發翔蔡東祥等三軍遂
合陸軍攻西梁山燒其鐵瑣寇不戰而走渡江攻魯港
克之陸軍復南陵玉麟進駐銅陵四月壬申玉麟將外
江內湖淮揚三軍十八營盛兵攻金柱關陸軍因襲太
平復其城夜攻金柱克之癸酉分遣王明山攻烏江李
成謀成發翔取蕪湖黃翼升襲東梁山皆克之玉麟悉
調上游水軍集濡須五月癸未玉麟督彭楚漢王吉喻
俊明成發翔王明山從溧洲會陸軍攻江甯城西頭關

破之寇倚洲作二壘玉麟分遣八營逼壘寇礮落船中
乃遣軍持火登岸伏葦下入夜火起宿葦枯根延燒新
莖燎一洲寇走出因襲燒其壘奪礮數百斬寇無筭王
麟自乘三板至下關諸軍方收隊見小船紅旗直上訶
之時昧旦初辨色王明山未起哨官廖德茂迎候言明
山連夜戰初還坐船玉麟領之已而陸軍將來問克壘
破關狀見玉麟杜則怖懼不知所言廖德茂往報王明
山明山間捷喜又謾罵曰諸蠢奴欲急滅長毛歸餓死
耶德茂言統帥夜已至下關乃驚起往謁玉麟紅旗小
去久矣故凡戰載福玉麟在或前或後水陸將士

皆惴惴莫不盡其力初陸軍之進雨花臺也寇鈔後斷
運道梗軍報不通軍中譁擾至是頭關破以水軍護糧
由江路進陸軍心始定自和春潰後至此官軍始再至
城下卒以合圍其先無水師故也癸巳黃翼升領淮揚
軍越寇屯赴上海因奏翼升署江南提督長江五千餘
里外江內湖軍分戍孫昌國等長屯江西猶隸於玉麟
七月李鴻章奏言紅單船不足用淮揚軍皆長龍三板
分船四十防三江口其餘入松江泖澱諸湖然於海面
風沙性不諳蓋始有意於輪船矣八月淮揚軍拒吳淞
寇敗之平七壘又攻澱湖北岸石壘破之奪舟二十徽

甯寇負舟越東壩謀爭金柱舟蛾集固城南漪湖玉麟
躬入湖拒之寇遶出花津岳斌往拒之九月乙卯戰關
下郭明鼈中礮死戊辰七營合陸軍攻花山彭楚漢等
先據上駟渡絕浮橋玉麟令曾泗美舍船助陸軍俱進
金柱守將羅逢元自後乘寇大戰破之寇敗趨橋遇楚
漢列船則大潰辛未破花津寇屯戊寅成發翔等戰石
臼湖奪寇舟四十旋克灣汴下游寇乃乘閒自浦口北
渡陷含山巢和是時廬州新復多隆阿不欲隸曾軍因
詔書援陝則北去故廬桐空虛玉麟屯濡須而寇復
踞運漕鎮杜其上游岳斌防蕪湖日奪東壩寇來舟十

月淮揚軍出青浦破寇舟於白鶴江更立太湖軍十營
李朝斌為統將黃翼升攻寇福山大破之初寇將駱國
忠以常熟反正寇起大眾圍常熟官軍往援隔太倉不
得進故合陸軍從福山入與寇相持十二月王麟克運
漕鎮旋收含山巢和二年二月淮揚軍進攻福山七十
餘日擊破來寇解常熟城圍三月分遣歐陽利見王東
華合陸軍克太倉崑山吳江五月王麟岳斌合陸軍大
陳兵攻九洑洲過江浦寇望風奔潰收其城遂破浦口
屯屯寇奔洲洲寇閉不納多投江及餓死者九洑洲為
江甯對岸重鎮寇築堅城以遏長江集戰艦環巨礮數

十護之自寇據城向榮和春師至洲寇必全力走江北
及甯國以誤我及曾國荃欲合圍而都興阿馮子才日
言九狀危險朝議憂疑含山之再陷也降人李世忠負
敢戰名以三萬眾扼九狀不勝故洲上寇壘愈高堅旁
列數十屯列舟緣洲亦自以為牢固於是王麟陳船上
流分二隊南從秦淮向下關北遶永安洲向草蕪夾更
列軍為南北後應而岳斌自督戰以枯荻灌油燒屯舟
因燒芻壘八襲燕子磯破之胡俊友中礮死洲寇不出
明日岳斌遣陸軍伏叢莽中掘洲埂分船夾洲上下更
列軍鄉城中關拒援寇乃散遣三板遶洲伺隙則登寇

分三隊發火槍傷死者數百人至夜王麟令曰洲破乃
還師不者傳餐而戰喻俊明成發翔王吉任星元更番
夜攻或有乘暗得登洲者眾譟而登皆冒礮爭上踐尸
而進人忘其死九洲竟破萬餘寇無一脫死者獲馬
三百餘匹悉送陸軍中捷未上江北爭飛書相慶詔
問狀且訝其速克焉七月安徽巡撫唐訓方有事苗練
以臨淮無水軍遣丁泗濱將船八十護糧運奏調淮揚
軍詔令岳斌自往國藩以長江事重大留岳斌李鴻
章言蘇松之戰水師功為多亦不能遣淮揚軍八月福
建寇入江西窺湖口彭澤旋敗走遂掠池州圍青陽喻

俊明往援又急檄江忠義陸軍出江西來援玉麟來視
師圍解甯太寇連屯高瀆溧水謀襲蕪湖陸軍并攻新
河莊玉麟躬攻水陽岳斌來會師克滄溪鎮逼高瀆降
寇守將遂收固城鎮克東壩降建平溧水寇將解散萬
計三年春 詔頻問國藩以楊岳斌彭玉麟宜分上下
游或內外江以鎮撫湖北江西四月奏遣玉麟駐九江
以上控湖北浙江巡撫左宗棠以岳斌為未盡其用且
密陳其才堪督撫癸巳 詔岳斌督師江西兼防皖南
未幾授陝甘總督岳斌之貴先玉麟及玉麟改提督
詔有統率文岳斌自恨非文官常見於詞色還江一奏

事被 詔令由國藩轉上當時論者皆以岳斌功高勝
玉麟遠甚歎息於文武積習諸文人又自恥持常談亦
交訟岳斌稱其才德至是被顯命督師專征眾皆欣欣
焉五月黃翼升還統外江軍內湖軍將孫昌國克貴溪
岳斌至南昌陸軍大將鮑超已破江西寇無所為則奏
劾江西統將席寶田以違節度奪三階六月乙酉江甯
平戊戌 詔論國藩功以勅立舟師為首八月進長江
圖岳斌督陸軍赴陝西黃翼升為水師提督 詔玉麟
駐安慶國藩奏今議立長江水師當周歷區畫五年正
月甲子國藩玉麟奏言瀕江五省戰事大定前募水勇

請改為經制水兵我朝綠營兵丁五十餘萬乾隆四十
六年議增缺額大學士阿桂上疏力爭之臣國藩於咸
豐元年亦疏請裁兵五萬自洪楊倡亂捻回繼變皆倚
勇丁以集事國家養兵歲費二千萬今直省勇丁合計
三十萬以外而經制之兵仍未能減非長策也大江水
師船至一千餘號礮位二三千利器不宜浪拋勁旅不
宜裁徹奉薪口糧修補船礮經費於長江酌留釐稅量
入為出計提督一員總兵五員營官副參游二十四哨
官都守千把外委七百七十四兵數萬二千兵餉雜費
月五萬有奇自荆岳二州至崇明五千餘里立六標分

汎計船七百七十四營二十四副將營戰船四十三參
將營三十三游擊營二十三自提督至外委各給坐船
長龍設大礮六三版大小礮各二設火藥局於安徽湖
北二省城設子彈局湖南省城設船局漢陽吳城草鞵
夾因奏事宜三十營制二十四六月軍機大臣會奏依
行編章程六卷入方略垂示後世頒之天下水師既立
而國藩移督直隸玉麟告歸黃翼升為提督七年長江
盜劫多有軍士不習篙楫時議疑本奏裁兵而更增兵
兵歲不用則罷惰與舊時水師營等兵不可久長江水
師亦宜罷其年國藩薨詔徵玉麟召見補兵部左侍

郎詢長江事宜復具疏三辭侍郎 詔每歲一巡長江
於是黃翼升請病去而李成謀為提督玉麟所至則江
湖肅然改觀作長江水師別弊百條上之著於令岳斌
先已罷陝督亦被徵 命巡江恒多引疾事專於玉麟
歲有効罰然舊部宿將皆衰老新補兵稀復知戰言輪
船礮利者益多矣

水師篇第六

浙江篇第七

湘軍志七

自寇踞江甯江南大營恒為浙輕重傾浙財賦供餉歲銀幾百萬湘軍乏於資則羨覲之然浙江故無事於湘軍湘帥浙撫每不相能咸豐十年羅遵殿自湖北來撫浙寇犯安吉長興始徵湘軍將蕭翰慶等未至省城陷駐防將軍瑞昌保子城江南軍赴救者自外乘之寇棄城走頃之大營潰散蘇常破援浙將張玉良自以新有功於浙收潰軍屯杭嘉間巡撫王有齡綜覈善理財由丞判為何桂清所舉不十年至大位故習江南諸將初至杭州則奏止湘軍事亟更奏調李元度劉培元等胡

林翼與書元度戒以擇所事培元亦不至而甯防將周
天受敗死督皖南軍張芾罷皆浙所供支倚以屏蔽衢
嚴者也有齡知當受兵則通使祁門請援曾國藩語不
及軍餉國藩以軍未集辭十一年杭州被圍 穆宗新
立銳意定天下 詔國藩兼制浙江超用左宗棠督軍
杭州時浙江屯援軍猶過四萬有齡復奏用李元度募
八千人入浙免論徽州罪且擢為按察使至龍游阻遏
不得進杭州城獨張玉良屯外未敢戰寇稍逼之玉良
中飛礮死諸軍不任戰反剽竊而坐索餉 詔左宗棠
代有齡 命下城陷有齡死之李元度謀退屯前安吉

令陳鍾英上書言今議者欲還軍常山或走衢州衢州自有防軍而江西不供餉無事保常山也閩為浙餉源江山一城為入閩咽喉固不如屯江山顧餉道與衢城相應賊必不敢略江山而攻衢亦不敢略衢城攻江山即常山不守自全策之上者也元度從之時宗棠未入浙境未能節度也浙江全省地唯湖州衢州城為國有而湖州孤居羣寇中旦夕不自保州人趙景賢以功節見重朝廷惜其死即授福建糧道促令赴官冀其脫免故論者以湖州已不可保唯固衢防曾國藩與宗棠議以保徽州固饒廣為根本奏以三府屬縣丁糧銀米

供軍設婺源景德河口三稅局裨之三府防軍悉隸宗
棠通吳越為一家以保江西宗棠佐湖南軍事十年勇
將健卒多歸心其名者黃少春崔大光張聲恒又雅善
王珍諸王多從之以初領軍亦益謹事國藩當補太常
卿有陳謝猶不敢自上奏凡有軍謀咨而後行自比於
列將及授巡撫竟因以起

同治元年正月癸卯宗棠領見軍九千人自婺源攻開
化破寇馬金自駐之遣王開來屯開化城是時王開化
已前病死將士皆偏裨戰守差自保蔣益澧者嘗為羅
澤南偏將不見重於曾胡歸將偏師入廣西連有功以

軍疲弱缺額降官俄復為大將浙江事亟國藩復奏薦
之即授浙江布政使令將所部增募新軍未至唯劉典
王文瑞號有戰略頗令率諸將當一路諸軍援浙者總
督慶端遣將防龍泉松陽政和別將秦如虎屯溫州江
蘇軍渡海收定海甯波仙居民團起義復台州列縣甯
波寇走紹興台州寇走處州溫州寇入金華與嚴州寇
合窺衢州守將李定太江山屯將李元度不能相救宗
棠恐朝旨促入衢則自陷因上奏曰行軍之法必避
長圍防後路先為自全之計臣軍入衢則微竅疏虞又
成糧盡援絕之勢今由婺攻開化分軍扼華埠收遂安

使饒廣相訖以安然後可以制賊而不為賊制然欲依
徽郡取道嚴州食米轉運殊多勞費又衢州李定太一
軍八千餘人江山李元度一軍八千餘人人數皆與臣
軍相等而常迫切呼援惴惴不能自保臣軍力固不能
及亦不願其浪戰求勝致損軍威此兵事餉事之難未
可驟期恢復之效者也二月遂昌松陽黃巖羣寇掠雲
和景甯樂清青田寇陷瑞安溫州南北被寇總督進駐
浦城壬戌王開來劉典劉璈李耀南攻遂安破寇城下
其夜寇棄城走以王文瑞守遂安寇再來攻卻之金巖
寇圍衢州急宗棠自往救至常山江山復請師未定所

鄉三月丁亥寇破峽口福建軍宗棠度勢注江山乃西
援與李元度合攻寇花園不克衢州寇亦西宗棠還常
山溫州羣寇還處州悉屯松陽遂昌江山寇亦東南攻
遂昌援軍福建將林文察破之石練四月甯紹台道張
景渠自定海招海盜商船西渡克鎮海進甯波合英法
軍攻城民團至者過十萬遂克甯波列縣進餘姚徽州
寇窺遂安走昌化遂昌寇復東還樂清瑞安攻溫州福
建軍將張啟煊戰敗慶端益增兵寇再圍溫州攻瑞安
縉雲青田樂清三城空虛民團因收集入保并攻松陽
五月寇復還景甯雲和福建軍屯龍泉拒之湯溪寇南

援松陽瑞安寇犯平陽民團因收泰順雲和甲辰張啟
煊感寇平陽殲之遂合白瑛秦如虎進攻處州宗棠軍
進衢州寇復攻遂安分軍破走之魏喻義劉培元各募
新軍至衢州乃分部防守六月衢州屯將廖士彥進遂
昌助林文察攻松陽民團因收宣平辛未克松陽七月
己亥復處州宗棠始進軍攻龍游蘭谿寇來援連屯數
十相持蔣益澧至衢州以高連陞熊建益為左右軍將
李元度坐徽州前事免散其軍甯波軍復餘姚八月以
史致諤代張景渠為甯紹台道寇復陷慈谿奉化總督
慶端改將軍耆齡代為總督丁丑上海軍克慈谿英人

華爾中礮死閏八月丙戌高連陞進軍收壽昌遂會熊
建益攻湯溪戊辰甯波軍克奉化宗棠自攻龍游去城
五里止屯魏喻義移屯淳安與遂安王文瑞軍相倚九
月徽州急文瑞移攻績溪淳安軍孤危寇以龍游湯溪
官軍盛輕喻義不來攻屯既久覺寇無能為稍稍移軍
十里二十里輒止月餘至銅關去嚴州六十里嚴州城
隔水西山奇險臨漸江山中饒良田民居寇至結屯相
保其魁曰林三頻拒戰寇讎之因自結於官軍謀報相
望王女者江山船船總也江山船例以婦人應官役雖
嫁生子猶自名為女王女主嚴州水繇寇至亦役之其

船往來無譏禁苦寇徵求又知其虛枵欲引官軍因至
銅關求見喻義喻義令他將見之既久具知城中寇動
靜亦頗因以通林三是月處州寇悉北趨東陽福建軍
分屯不復進十月有 詔聽法國人領兵攻甯波用內
地軍制十一月嚴州寇攻西山庚申王女遣報銅關軍
言寇怒林三奪其米舟期明夜襲西山城空可破請具
舟濟師林三亦請援官軍士爭奮願往乃報如約辛巳
日晡迎官軍船至者數十喻義選千人自將以往午夜
薄嚴州城城上柝聲斷續不設燎火殊無戰備軍士勇
者梯西門以登殺柝者而代之遂斬門鑰納軍軍入而

謹寇驚出搏戰餘守城者皆下短兵相斫然倉皇無門
志頃之潰走其攻西山者以有備不能克將還城望城
中火光有異疾趨城下聞報官軍已入闕然大奔壬午
復嚴州捷書聞諸將皆驚愕焉方與寇相持求勝之極
難乃無意收一大城以此頗得寇虛實益其戰守亦無
以大異官軍云甯波軍克上虞台州民圍收新昌嵯劉
典解蘭谿圍援祁門未至王文瑞已復收祁門績溪典
屯羅埠甯波軍進攻紹興寇自金華援湯溪自蘭谿援
龍游熊建益劉培元等拒戰屢敗之
二年正月戊午湯溪寇有歸誠者誘寇將出城副將劉

樹元伏壕中突起禽四人湯溪西門開復其城高連陞
進攻金華己未寇遯收其城江西援軍將王德榜偪龍
游城南作三壘寇出西門攻官軍敗之載所掠走湯溪
湯溪已反正遂皆北走蘭谿寇亦棄城走福建軍收武
義永康於是東陽義烏浦江寇皆遯蔣益澧自義烏劉
典自浦江合攻諸暨民團起應官軍寇懼獻其城己巳
復諸暨甯波軍攻紹興破城外寇屯城中民謀反正約
官軍甲戌夜舉火為內應火發軍至寇遯走乙亥復紹
興乙亥龍游官軍水陸並進收桐廬杭州寇震懼悉力
拒富陽宗棠懼江南寇鈔衢嚴乃分軍遣劉典西防徽

將益澧進攻富陽二月戊寅甯波軍躡寇蕭山復之壬
午富陽水軍燒寇舟因屯南岸將益澧渡江屯新橋庚
子寇列陣拒戰熊建益陷陣先入寇分黨攻中軍高連
陞出追被鈔張志公王宗元等馳救之宗元中槍死志
公被數創連陞乃得收眾還辛丑援徽軍將劉典合徽
防將唐義訓拒寇徽州城東遣黃少春奪巖寺寇屯追
破之於潛口進屯漁亭寇以故西犯江西王德榜還軍
浮梁三月甯國池寇合黟寇逼祁門阻浙徽軍黃少春
合王沐擊散之復黟遂躡寇浮梁四月杭嘉寇出餘杭
臨安圍攻新城守將魏喻義不能拒宗棠發嚴州軍合

蔣益澧高連陞軍援新城留熊建益屯新橋寇乘軍少
來攻建益擊走之乘勝追寇薄其壘中槍死益澧連陞
俱還屯益徵甯波艇船助水軍燒錢塘寇舟因平杭州
西門外寇屯富陽援寇逃走五月劉典軍合江西大軍
攻寇鄱陽陶溪破之寇北走彭澤湖口 詔以總督耆
齡所將軍浮允移耆齡福州將軍令還閩授宗棠總督
仍兼浙江巡撫軍中疾疫宗棠病瘧困殆富陽久圍不
下增募外國軍助攻六月江忠義將新軍出江西攻湖
口江南江西軍勢盛寇東北走圍青陽劉典還屯徽州
江蘇軍自松江進攻嘉善嘉興寇皆北救相持於張涇

八月庚辰水陸大舉攻富陽奪城北雞籠山發礮攻城
寇棄城走壬午高連陞破新橋寇壘二十分兵屯富陽
新橋始合軍攻杭州蔣益澧杜城北屯留下高連陞在
城南屯六和塔康國器魏喻義等攻餘杭杭州寇築壘
連四十里西通餘杭九月庚戌城寇來攻六和屯破走
之壬子進屯天馬南屏諸山十月增四壘自天水橋以
西為餘杭聲援江南寇多歸誠連復高淳甯國建平溧
水屯軍東壩江蘇軍克蘇州十一月丁未江蘇軍破寇
張涇匯平湖寇迎官軍庚戌復其城癸丑乍浦反正乙
卯復海鹽澈浦反正江蘇軍分攻嘉善嘉興宗棠進駐

富陽移富陽屯軍助攻餘杭調援皖軍將黃少春自分水出新城抗餘杭西南丁卯蔣益澧楊昌濬黃少春合兵萬三千攻餘杭城西北戰一日所殺傷相當其夜寇益作長壕增壘依城以抗官軍益澧還留下庚午江蘇軍復嘉善十二月癸酉朔高連陞攻杭州城破寇壘十甲戌遂偏城西北圍其四門江蘇軍合四道攻嘉興黃少春等懼無功又恐寇避蘇軍悉西南走潰圍乃急攻餘杭與援寇戰林清堰敗而還湖州寇皆東援嘉興江蘇軍將何安泰戰死程學啟等急攻城城屢破復完士卒多傷海甯寇將蔡元隆懼嘉杭軍逼而患杭寇之徵

其眾歸誠官軍將益禮請以廖安之知海甯往撫之丙申安之至海甯蔡元隆逡巡未即出元隆前踞太倉亦以詐降欺官軍陷我軍四百人至是從者皆懼安之入州堂徐遣告元隆曰頭目畢集乃來見元隆從兵眾往見之安之大言曰若等皆朝廷赤子今居大軍中旦夕俱死故吾知若等歸誠非偽也如欲用太倉故智者可斷吾首元隆情得頓首曰方以太倉事自疑今以死從公即從渡江還除兵改服迎官軍己亥收海甯易元隆名曰元吉汰其眾留精卒四千以元吉將之隨大軍自效以劉樹元張景渠等屯守海甯

三年正月遣蔡元吉襲桐鄉甲辰元吉突至桐鄉城下
梯而登守寇覺拒堞傷我軍百餘人乃屯城西南增遣
李邦達合張景渠軍屯城東北戊申寇歸誠庚戌收桐
鄉以歸誠人何培章將其眾三千屯烏鎮斷杭嘉道絕
寇運蔡元吉屯桐鄉劉樹元進攻嘉興蘇浙軍始合矣
嘉興寇將乞援湖州悉眾東援礙烏鎮且憾何培章築
屯圍攻之培章請援杭州蔣益澧不能往遺書劉樹元
激厲之戊辰樹元還軍烏鎮視地形渡水增二壘庚午
寇大合眾攻新壘歸誠人兇懼反先潰樹元日暮突圍
出前渡舟已失所往半夜潛行還復入空壘堅壁相持

培章元吉益資之糧寇不得進二月戊寅寇略雙橋攻
桐鄉元吉出戰敗之丙戌追寇鑪頭元吉突陳被槍斫
掌麾衆直進平寇壘十丁亥寇來攻復敗之己丑進烏
鎮江蘇軍攻嘉興城薄四門水軍入南湖程學啟礮壞
城三面凡百丈麾軍乘之寇死拒學啟中槍子顛諸軍
繼登擲火燒城中寇大亂蹙斬數千計誅其兩帥克嘉
興庚寅烏鎮寇奔湖州甲午蔣益澧攻杭州陳兵五門
別遣軍攻城北長街城寇出援大戰自日中至暮多所
殺傷各還屯其夜寇啓北門走乙未省城復餘杭寇亦
東走與杭寇合奔德清宗棠發親軍遣楊昌濬將之攻

武康高連陞攻德清蔡元吉攻石門三月壬寅宗棠移
駐省城申虜獲之禁婦女財物各從其主有敢言取自
賊中者罪之禁軍士無入民居招商開市奏停杭關稅
立清賦局減杭嘉湖稅則三之一蔣益澧為布政使亦
輕財致士杭州善後事一時翕然稱之初盛時城內外
居民男女口八十一萬及復城才七八萬宗棠長於治
簿書故州縣盡心焉甲辰武康反正乙巳收德清石門
反正寇奔孝豐西南走昌化諸軍進圖湖州江蘇軍二
萬人攻長興廣德寇皆東援湖州寇逆拒官軍於石門
德清復分拒江蘇軍於太湖五月江蘇軍水陸屯夾浦

湖州寇東窺南潯水軍東援寇復西赴長興與廣德寇合勢分軍擊敗之師進寇復還拒又敗之門於西北門作浮橋渡軍癸亥合圍寇馮城擲火燒攻具士皆冒火攀堞上死者數百人將領畢登寇突西門走遂克長興湖州寇知必死則分黨綴江蘇別軍於南潯而悉眾拒蔡元吉於荻港廣德援寇屯四安楊昌濬自武康西攻孝豐六月壬申軍薄城其夜寇遁癸酉收孝豐北攻安吉蔣益澧合諸軍進屯陵湖江蘇軍南進四安西攻晟舍南潯屯軍亦西進織里乙酉曾軍克江甯寇悉由廣德奔湖州作屯尹隆橋通道往來江蘇軍先攻橋屯多

傷戊子合軍攻晟舍不利自辛卯至乙未蔣益澧頻進戰寇增壘思溪與相持丙申英國將發礮攻寇屯不能克寇圍蔡元吉東埠屯益澧進軍作壘增調礮船輪舟又結浮橋渡思溪援東埠不能達英國將遇寇戰輒敗退七月蔣益澧議先攻荻港甲辰進軍丙午破寇三屯寇水軍將率其戰船歸誠水軍乃出太湖鈔寇背而蔡元吉乘隙潰圍出喪其軍四之三皆飢羸無人色其被圍二十餘日矣煮桑皮為糧且六七日以大軍赴救力戰雖不能達感義忍死終無逃叛丁未江蘇軍及甯波將合攻晟舍克之寇初以全力圍東埠而蔡元吉突走

晟舍又破己酉乃西遯江蘇軍進屯大錢口劉樹元進屯昇山癸丑甲寅湖州城寇來歸誠者相繼高連陞復攻袁匯寇奔城城寇開西門分走廣德孝豐乙卯收湖州丙辰楊昌濬克安吉追寇孝豐遇湖州來寇與孝豐守將合擊之寇合走甯國與廣德寇俱走昌化分黨出涪安餘悉西趨績溪黃少春等復自嚴州拒涪安寇寇亦北走徽州婺源屯軍東還抗開化寇散走或逸出掠江山常山皆遇官軍不復能喙息奔江西廣豐語杜江西後篇浙江既定十月宗棠奏以蔣益澧護巡撫已之總督任而寇先自江西犯福建按察使張運蘭署提督

林文察皆名將連敗死乃以全軍入閩追寇至廣東竟收成功焉

寇之自杭湖廣德西走浙軍將報言衆數千江西軍將言精悍者過十萬督撫各據以告左宗棠前以洪福未死譏切江南大軍及自浙逸出諸帥皆言洪福由浙縱之江西諸將既不悅於曾國荃左宗棠故戰最力寇既連敗因走廣東同治三年九月張運蘭自江西瑞金入汀州廣昌諸寇復直南趨大埔折西北略武平欲攻運蘭軍以合贛寇運蘭屯軍下壩未戰大埔寇還北襲永定陷之自西北間鈔運蘭軍運蘭方食寇已入屯後起

索馬遇寇營門擁至永定城與裨將總兵賀國琛以下二十人皆死龍巖南靖漳州俱陷閩中大震運蘭王珍舊部也獨將十餘年為曾國藩所倚重倉卒敗虜江西軍亦奪氣宗棠急檄黃少春等四千五百人自衢州趣延平劉典將新軍八千人自建昌趣汀州高連陞將四千五百人自甯波汎海至福州期會泉州雖張遠勢距寇遼闊福建提督林文察攻漳州又敗死宗棠躬駐延平增調王德榜軍二千五百人自贛入汀繼劉典因奏以德榜署按察使十二月寇北圍漳平劉典自連城東援新軍輕進大敗棄屯還走保連城當是時寇屯漳州

北踞龍巖南取雲霄西略上杭以北窺汀州眾號二十餘萬官軍遙與相持四年二月寇西還永定江蘇軍將郭松林來會師圍漳州鮑超前軍將婁雲慶自瑞金入武平四月寇棄漳州出大埔劉典等收南靖江蘇軍南收漳浦以西及雲霄詔安五月劉典進攻永定高連陞等進武平寇南破粵軍於鎮平八月西犯平遠遂走龍南宗棠以為湖南邊無備寇且日西未可驟滅也而江浙軍勢盛宜無戰事因遂進駐大埔高連陞等逐寇六日夜中伏大敗寇反南趨連平東掠和平興甯十月陷嘉應連陞等還軍救之後不相及劉典屯丙村在寇道

北偏宗棠親軍少弱勢危甚急召王德榜扼三河壩三河者大小靖溪及雁石溪所匯也按地圖為潮州要衝德榜往察地形皆山道絕澗度寇必不往且大埔帥屯孤縣寇直犯軍必不能支乃自請當中路陳兵步步設守而後進劉典屯既偏遠聞德榜軍進懼以避寇為罪則分軍疾出其前猝與寇遇寇行疾勢銳典軍未陳而敗掠德榜屯東潰寇長驅追典軍德榜軍眾皆懼或曰兵法趣利者蹶此成禽也寇不西走贛桂而欺侮閩廣諸軍必汪海洋之謀宜選火槍視寇帥龍旂擊之餘皆馮壘自固可以不敗乃徐視其所為及戰寇前隊直進

火槍環擊之寇不得前引而返走諸軍喜曰賊易與耳
今敗矣乘之果大奔其夜歸誠人踰四萬言寇帥中礮
死矣軍皆大喜推鋒西進鮑超軍亦至嘉應寇出拒又
大敗之於是閩浙江粵軍合圍嘉應諸將夜升山岡望
官軍火如龍蛇城寇勢杜掌中皆度寇必乘夜潰圍抗
城南黃沙嶂以待之十二月癸丑夜寇潰走礙諸屯不
得遜官軍登山呼曰棄械者免死羣寇跪道旁求免者
六萬餘人俘寇將七百三十四皆斬之拔良民男女萬
餘人陳斬羣寇可計數者萬六千自寇起至破滅未嘗
見斬刈如此之易諸將知必勝智勇亦益發舒於是洪

寇餘黨悉平五年正月甲申宗棠師還諸軍皆凱還而
廣東軍將猶不知兵適會寇平亦全師而還

浙江篇第七

江西後篇第八

湘軍志八

江浙淪陷寇聚於東及曾左用師皖南多隆阿曾國荃揚兵安廬寇無所騁則汎溢西出而領外羣寇陰受號召聚黨千數百人出掠芎縣旬日數萬亦皆由江西達皖浙故江西為羣寇孔道自咸豐十年至同治三年江甯復之先寇凡三大至至輒蹂千里皆賴鮑超軍奮擊以免而士民被害深鉅矣軍興以來直省督撫能將將者存不知兵者亾存亾之由入其境可知也江西之無兵與蘇杭同然卒不亾且與湖北比功何哉四戰之地良將勁卒往來輻湊或赴援力戰或假道自達因而用

之留而使之將不必自選軍不必素練客軍游擊亦足以奏功蓋代人受禍者亦因人以收績天道地利使然也江西巡撫自陳啟邁文俊者齡暉光宸毓科皆守承平制委權司道穆宗即位則超用沈葆楨葆楨習於湘人始自養軍重用湘將湘將名者不可致唯王德榜段起以偏師積閱闕為大將同治二年江甯事亟曾國藩奏徵江忠義軍自江西出湖口轉戰青陽忠義病死葆楨悉留所部始有悍摯猛銳之軍與王段相輔矣左宗棠奏以劉典屯防江皖及蘇杭並復朝廷銳意平寇尤憂江西頻詔問曾國藩以彭玉麟楊岳斌宜分

一人鎮撫國藩以江西寇數來去遣師輒破走之未重
注意也宗棠獨重岳斌以為不展其材乃特奏言湖常
廣德寇趨江西江西安危係東南請專 詔岳斌當一
面與 廷議相符三年四月 特命岳斌督江西軍且
曰曾國藩頗奏請大臣分任軍事今得其人矣是時浙
寇逸出浙軍將報言殘眾數千人而席寶田上言強寇
過十萬國藩葆楨據以上聞且飛檄湖南廣東防大敵
寇入江西者曰李世賢汪海洋海洋踞貴溪金谿瀘溪
南及新城界而廣昌寇北陷南豐與相應世賢屯崇仁
北踞東鄉東併宜黃諸軍分部攻守江忠朝席寶田攻

崇仁劉典王文瑞自樂安北進鮑超自豐城南下期會
兵崇仁城下王沐自撫州攻金谿至許轡遇伏敗績寇
圍撫州王德榜王開琳等屯安仁東遏貴谿西圖東鄉
周寬世屯進賢衛省城水軍將孫昌國屯弋陽劉于潯
屯盱水自江西用兵以來設備之盛未嘗有也岳斌至
則議增兵八千以餉乏未果行六月周寬世合王德榜
等軍圍東鄉南豐寇援崇仁劉典席寶田合擊敗之寇
勢西趨移王沐撫州軍屯豐城東界檄王文瑞退西屯
永豐丙戌鮑超進軍遇南豐援寇於豐城東敗之庚寅
東鄉圍軍進距城十里遂止屯七月鮑超議攻許轡或

曰寇虜聚撫建蓄勢思逞未有所決兵法窮寇勿蹙歸師勿逼不可輕戰也或曰汪李二寇當敗亡之際猶不相下有地而棄之又不能卷甲蹈利逃死巖險而貪連大衆久屯腹地此其愚不可瘳吾軍遙與相持示之以怯一路潰解則諸軍瓦解諸公但知貪賊自重不知敗死之可憂耳公行兵利速戰請一鼓而破之壬寅鳴角直進屯後羣寇方瞭望前鋒已逼壘門寇四散迎鬥斫擊之因燒其中屯羣寇大奔既克許彎遂進攻金谿捷聞曾國藩與書沈葆楨曰鮑公以偏師破賊數萬出人意外然超不知文字其戰狀眾莫之知也已酉東鄉寇走

金谿金谿寇走瀘溪宗仁寇走宜黃超進兵追之東鄉
寇將率眾六萬詣軍門歸誠超悉納之收洋槍精兵七
千人以隸己軍復瀘溪餘寇走新城壬子宜黃寇走南
豐超進屯建昌乙卯裨將唐仁廉進兵收新城寇望風
東走丁巳南豐寇走廣昌南甯都知州郭毓龍城守
寇走雩都王文瑞軍乘之寇西南走信豐犯南安不得
入悉黨踞瑞金超休兵南昌岳斌進駐甯都悉徵水陸
軍會師席寶田以浙防空虛疑不進曰今浙寇未盡殄
而聚兵一隅如何哉岳斌本以寶田首訾浙縱寇侵左
宗崇心銜之至是因奏以違節制奪按察使降補知府

奏甫上浙寇大至巡撫急召寶田而岳斌亦奉 詔補
陝甘總督促赴鎮於是王開琳先還屯開化王德榜劉
典還婺源江忠朝追寇在南贛八月寇出開化犯玉山
擁洪福西行浙軍將黃少春先扼廣信劉典出屯貴溪
寇走鉛山將循建邵邊合瑞金寇屯將張岳霖合王德
榜軍邀之寇疾走瀘溪斜趣山谷間晝夜行諸軍將皆
甘心洪福爭百里而趨利鮑超自出南豐席寶田出瀘
溪王開琳及劉明珍魏喻義等皆至江西追寇瑞金寇
亦東北趨石城道謀迎洪福九月席寶田邀寇新城不
及遂率輕兵裹糧行三日夜及之廣昌寇馮領殊死鬥

官軍踊躍赴擊大破之寇三千人殘千餘脫南走軍疲
欲休寶田曰洪福杜此今縱之與瑞金來寇合不可得
矣度寇一日未食必止餐令軍士傳餐夜進己酉平旦
及石城見炊煙令繞旁山先設伏乃陳寇見官軍遽走
入伏中俘斬過半於是生得諸洪及洪福未昏妻而洪
福走免寇悉潰散無可追迹乃止屯癸丑鮑超兵至瑞
金瑞金寇南奔武平辛酉寶田軍所俘小兒牧馬者語
其曹曰小天王過此矣即訊之洪福乃反從數小兒北
走就禽之諸俘者皆曰是也洪福之未獲羣帥爭以為
重至是以聞 詔曰么膺漏網不直檻送京師磔之南

昌市而汪海洋等入福建復連陷汀州列縣李世賢距
漳州詔鮑超分軍遣婁雲慶與劉典王德榜軍俱入
閩王文瑞先授贛南道泣本任王開琳兼將其軍屯贛
州周寬世自信豐東進長甯張岳霖自龍泉屯會昌固
南贛韓進春屯瑞金劉勝祥屯廣昌與席寶田石城軍
俱防撫建寇往來福建廣東界頻破張運蘭林文察高
連陞劉典及廣東李福泰軍左宗棠至浦城督師復徵
江蘇軍助戰鮑超假還奉節前軍當援甘肅者憚西征
且多新降寇樂攻剽至金口以餉乏為名叛而南走四
年四月庚寅叛軍掠袁州袁州城守不得入江西西界

復震王開琳屯永定防汪海洋者亦為海洋眾所圍屯破沈葆楨既以母疾假歸遭母喪署巡撫孫長紘亟奏起復葆楨葆楨辭劉坤一代為巡撫坤一前將湘軍久杜江西諸軍將無不相習聞其至皆喜五月叛卒走廣東合汪李羣寇江西諸軍並防南安曾國藩以坤一猶未上遣江南軍將劉連捷等屯臨瑞兼捍湖南邊叛軍趨信豐東南犯興甯與寇會龍川不相容復分犯平遠鎮平八月席寶田自平遠進攻寇逆戰寶田先令精兵繞攻其後乃列陳大戰汪海洋之戰也務猛進其所將皆羣寇養子年二十以下居兵間十餘年懵不知畏死

故寶田堅陳不戰俄而我軍斫寇屯直出其壘門裨將
榮維善望見海洋大旗急前搏之刃其背於是寇大敗
走自拔來歸者七千餘人浙軍遂收鎮平寇西掠長甯
定南龍南寶田周寬世移屯信豐婁雲慶王開琳進自
定南左宗棠以為寇終不復東犯則遣王德榜還汀州
而躬率親兵八百人駐漳州丙午高連陞之師敗於長
甯己未席寶田大破寇於信豐寇復南走和平圍連平
鮑超復至江西招叛軍婁雲慶仍以軍屬超劉典自南
康縣進南雄寇陷嘉應坤一受巡撫事將出行邊江西
南界復定鮑超進軍會昌因奏請左宗棠入粵督師語

在浙江篇十二月嘉應復羣寇悉平仍 詔超軍入關
寶田軍援黔諸軍將當赴官者多乞歸壯丁還農東南
休息

江西後篇第八